

四庫全書

子部

欽定四庫全書

藝文類聚卷三十一

唐 歐陽詢 撰

人部十五

贈答

贈答

毛詩曰無言不酬又曰雜佩以贈之又曰贈之以芍藥
又曰投我以木瓜報之以瓊琚匪報也永以為好也又
曰吉甫作頌其詩孔碩其風肆好以贈申伯

晏子曰曾子將行晏子送之曰君子贈人以軒不如贈

人以言

史記曰孔子適周見老子辭去老子送之曰吾聞富貴者送人以財仁者送人以言吾竊仁者之號請送子以言

孫卿子曰贈人以言重於金石珠玉勸人以言美於黼黻文章聽人以言樂於鐘鼓琴瑟

莊子曰凡交近則必相靡以信遠則必忠之以言

韓子曰鄭人有遺燕相書者夜書火不明因謂持燭者

曰舉燭而過書舉燭非書意也燕相國受書而悅之曰
舉燭者高明也舉賢任之司以治

穆天子傳曰穆王饗西王母于瑤池之上上賦詩往來
辭義可觀

漢書曰古者諸侯卿大夫交接鄰國以微言相感常揖
讓之時必稱詩以喻其志又曰陳遵為河南太守既至
官常遣從使西召善書吏十人於前治私書謝京師親
故遵憑几占書數百封親疎各有意

文士傳曰桓麟伯父焉官至太尉麟年十二在座焉告
客曰吾此弟子知有異才殊能作詩賦客乃為詩曰甘
羅十二楊烏九齡昔有二子今則桓生麟即應聲荅曰
邈矣甘羅超等絕倫伊彼楊烏命世稱賢嗟予蠢弱殊
才偉年仰慙二子俯媿過言

漢雜事曰高彪謁馬融辭疾不見彪覆刺與書曰聞高
風為日久矣故不待介者造君子之門冀一見龍光叙
腹心之願不圖辭之以疾昔者周公兄父文武九命作

伯以君華夏猶握沐吐食以接白屋之士天下歸德歷載邈矣今君不能相見宜哉融省書大慙遣人辭謝追請徑去不還

先賢行狀曰杜安入太學時號曰神童時貴戚慕安高行多有與書者不輒發以慮後患常鑿壁藏書當時皆嘉其慮遠

會稽典錄曰陳業有特操沛國桓儼當世英俊避地會稽聞業高節欲與相見終不獲後儼浮海南入交州臨

去遺書與業曰不因行李以係陰山白樓日從容養高
動靜履直季世多艱爰適樂土聞高風飢渴語言知乃
深隱邈然終時求仁斯得勤而無憾齊蹤古賢何其優
哉

蜀志曰馬良使吳良謂諸葛亮曰今銜國命協睦二家
幸為良介於孫將軍亮曰君試自為文良即為草曰寡
君遣掾馬良通聘繼好以紹昆吾豕韋之勲其人吉士
荆楚之令鮮於造次之華而有克終之美願降心存納

以慰將命權大悅之

文章叙錄曰杜摯與母丘儉鄉里相親故為詩與儉求仙人藥一九欲以感切儉求助也

荀氏家傳曰荀勗蜀平之後遣使通吳司馬文王用公所作書與孫皓皓報命和親王謂公曰君前作書使吳思順勝十萬之衆也

楚辭曰結微情以陳詞兮矯以遺夫美人

詩後漢蔡邕荅對元式詩曰伊余有行爰戾茲邦先進

博學同類率從濟濟羣彥如雲如龍君子博文貽我德音辭之集矣穆如清風又荅卜元嗣詩曰斌斌碩人貽我以文辱此休辭非余所希敢不酬荅賦誦以歸

魏王粲贈蔡子篤詩曰悠悠世路亂離多阻濟岱江衡邈焉異處風流雲散一別如雨

魏徐幹荅劉楨詩曰與子別無幾所經未一句我思一何篤其愁如三春雖路在咫尺難涉如九關陶陶朱夏別草木昌且繁

魏應瑒報趙淑麗詩曰朝雲不散久結成陰離羣獨宿
永思長吟有鳥孤栖哀鳴北林嗟我懷矣感物傷情

魏繁欽贈梅公明詩曰瞻我北園有條者桑邁此春景
既茂且長氤氲吐葉柔潤有光黃條蔓衍青鳥來翔日
月其邁時不可忘公子瞻旃勲名乃彰

魏程曉贈傅休奕詩曰煢煢獨夫寂寂靜處酒不盈觴
肴不掩俎厥客伊何許由巢父厥醴伊何玄酒瓠脯又
贈傅休奕詩曰三光飛景玉衡代邁龍集甲子四時成

歲權與授代徐陳蕩穢元服初嘉萬福咸會赫赫應門
嚴嚴朱闕羣后揚揚庭燎哲哲

魏邯鄲淳荅贈詩曰我受上命來隨臨苗與君子處曾
未盈暮見召本朝駕言趣期羣子重離首命于時餞我
路隅贈我嘉辭既受德音敢不荅之余惟薄德既局且
鄙見養賢侯於今四祀既庇西伯永誓沒齒今也被命
我在不俟瞻戀我侯又慕君子行道遲遲體逝情止豈
無好爵懼不我與聖主受命千載一遇攀龍附鳳必在

初舉行矣去矣別易會難自強不息人誰獲安願子大
夫勉簣成山天休方至萬福爾臻

晉張華荅何劭詩曰良朋貽新詩示我以遊娛穆如灑
清風煥若春華敷自昔同寮寗於今比園墟衰疾近辱
殆庶幾並懸輿散髮重陰下把杖臨清渠屬耳聽鳴禽
流目玩儵魚從容養餘日取樂於桑榆又詩曰駕言歸
外庭放志永棲遲相伴步園疇春草鬱鬱滋榮觀雖盈
目親友莫與偕悟物增隆思結戀慕同儕援翰屬新詩

永歎有餘懷又贈摯仲治詩曰君子有逸志棲遲於一
丘仰蔭高林茂俯臨淥水流恬淡養玄虛沉精研聖猷
晉何劭贈張華詩曰四時更代謝萬物迭卷舒暮春忽
復來和風與節俱俯臨清泉涌仰觀嘉木敷在昔同班
司今者並園墟私願偕黃髮逍遙樂琴書舉爵茂陰下
攜手共躊躇奚用遺形骸忘筌在得魚

晉潘岳為賈謐贈陸機詩曰神農更生軒轅承紀畫野
離疆爰封衆子夏殷既襲宗周繫祀綿綿瓜瓞六國互

峙疆秦兼并吞滅四隅子嬰面櫬漢祖應符靈獻微弱
在涅則渝三雄鼎足孫啓南吳南吳伊何僭號稱王大
晉統天仁風遐揚偽孫銜璧奉土歸疆婉婉長離陵江
而翔長離云誰咨余陸生鶴鳴九臯猶載厥聲况乃海
隅播名上京爰應旌招撫翼紫庭蕃岳作鎮輔我京室
旋及桑梓帝弟作弼式云國官清塗攸失吾子洗然恬
淡自逸廊廟惟清俊又是延擢應嘉舉自國而遷齊轡
羣龍光贊納言優游省闈珥筆華軒昔余與子繾綣同

朝脩日朗月攜手逍遙自我離羣二周于今雖簡其面
分著情深子其超矣實慰我心發言為詩望俟好音欲
崇其高必重其曾在南稱甘度北則橙崇子鋒穎不騫
不崩

晉陸機答賈謐詩曰先天創物景命是膺降及羣后迭
毀迭興邈矣終古崇替有徵在漢之季皇綱幅裂雄臣
騰驚義夫赴節釋位揮戈言謀王室王室之亂靡邦不
泯如彼墜景曾不可振乃眷三哲俾乂斯民啓土綏難

改物承天天厭霸德皇祚告釁獄訟違魏謳歌逼晉陳
留歸蕃我皇登禪庸嶠稽顙三江改獻惟公太宰光翼
二祖誕育洪胄纂戎于魯昔我逮茲時惟下僚及子棲
遲同林異條年殊志密服舛義稠遊跨三春情固二秋
祇承皇命出納無違往踐蕃朝來步紫微升降秘閣我
服載暉孰云匪懼仰肅明威分索則易攜手實難念昔
良遊茲焉永歎公之言感貽此音翰蔚彼高藻如玉如
蘭民之胥好狷狂厲聖儀刑在昔爭聞子命又荅潘尼

詩曰於穆同心如瓊如琳我日來徂來餞其琛彼美潘
生實綜我心探子玉懷疇爾惠音又贈馮文罷詩曰嗟
我人斯戢翼江潭有命集止翻飛自南出彼幽谷及爾
同林雙情交映遺物識心又贈潘尼詩曰水會於海雲
翔於天道之所混孰後孰先及子雖殊同升太玄舍彼
玄冕襲此雲冠遺情市朝永志丘園靜猶幽谷動若揮
蘭又贈從兄車騎詩曰孤獸思故藪離鳥悲舊林翩翩
遊宦子辛苦難為心髣髴谷水陽婉奕崑山陰營魄懷

茲土精爽若飛沉又贈波邱令馮文熙詩曰風駕出東
城送子臨江曲密席接同志羽觴飛鄴渌登樓望峻阪
時逝一何速又贈紀士詩曰瓊瓌俟豐價窈窕不自鬻
有美娥眉子惠音清且淑修姱協姝麗華顏婉如玉又
贈顧彥先詩曰清夜不能寐悲風入我軒立影對孤軀
哀聲應苦言

晉傅玄答程曉詩曰奕奕兩儀昭昭太陽四氣代升三
朝受祥濟濟羣后戢戢聖皇元服肇御配天垂光伊周

作粥王室惟康顥顥兆民蠢蠢戎糴率土充庭萬國奉
蕃皇澤雲行神化風宣六合咸熙遐邇同歡赫赫明明
天人合和下周遺滯焦朽斯華矧我良朋如玉之嘉穆
穆雖難興頌作歌又荅程曉詩曰羲和運玉衡招搖賦
朔旬嘉慶彤三朝美德揚初春聖主加元服萬國望威
神伊周敷玄化並世霑天人洪崖歌山岫許由嗟水濱
晉傳咸贈褚武良詩曰爰暨于褚惟晉之禎肇振鳳翼
羽儀上京聿作喉舌納言紫庭光贊帝道敷皇之明方

任之重實在江揚乃授旄鉞宣曜威靈悠悠遐邁東夏
于征又贈建平太守李叔龍詩曰弘道興化實在良守
悠悠建平皇澤未流朝選於衆乃子之授南荆注望心
乎克副又贈太尉司馬虞顯機詩曰帝崇元淑妙選其
屬命子是佐增袞之縟又贈崔伏二郎詩曰英妙之選
二生之授顓顓兩城歡德之茂君子所居九夷非陋無
狹百里而不垂覆人之好我贈我清詩示我周行心與
道期誠發自忠義形於辭古人辭讜豈不爾思又與尚

書同僚詩曰非望之寵謬加于已猥授非據奄司萬里
煌煌朱軒服驥叅駉暉暉初星肅肅臣僕暉光顯赫衆
目所屬斯之弗稱匪榮伊辱質弱尚父受任鷹揚德非
樊仲王命是將百城或違無能有匡一州之矜將弛其
網得意忘言言在意後夫惟神交可以長久我心之孚
有盈于缶與子偕老豈曰執手出司萬里牧彼朔濱服
冕乘軒六轡既均威風先邁百城肅震又答潘尼詩并
序曰司州秀才潘正叔識通才高以文學溫雅為博士

余性直而處清論褻貶之任作詩以見規雖褻飾之舉
非所敢聞而斐粲之辭良可樂也荅之雖不足以相訓
報所謂盡各言志也詩曰貽我妙文繁春之榮匪榮斯
尚乃新其聲吉甫作頌有馥其馨寔由樊仲其德克明
授此瓦礫廁彼瑤瓊貺非其喻聞寵若驚又荅樂弘詩
并序曰安樂令樂弘太傅鉅平侯羊公辟未就而公薨
後應司州之命舉秀才博文通濟之士余失和於府當
換為護軍司馬賦詩見贈荅之云爾鉅平作宰是貴是

欽弓旌仍招嘉命胥尋鸞鳳養儀戢翼幽林未附雅調
以和韶音鉅平遐逝屬志彌深肅肅京司清風載邁乃
延羣彥龍集鳳會亦既斯降萬里有賴聲發響應好結
傾蓋

晉潘尼荅傅咸詩序曰司徒左長史傅長虞會定九品
左長史宜得其才屈為此職此職執天下清議宰割百
國而長虞性直而行或有不堪余與之親作詩以規焉
悠悠羣吏非子不整嗷嗷衆議非子不靖忽荷略紐握

網提領矯矯貞臣惟國之屏又贈吳王郎中令陸士衡
詩曰東南之美曩惟延州顯允陸生於今鮮儔振鱗南
海濯翼洪流婆娑翰林容與墳丘玉以瑜潤隨以光融
乃漸上京乃儀儲宮玩爾清藻味爾芳風泳之彌廣挹
之彌冲崑山何有有珣有珉及爾同僚具惟近臣予涉
素秋子登青春媿無老成厠彼日新祁祁大邦惟桑與
梓穆穆伊人南國之紀帝曰爾諧惟玉卿士俯俸從命
奚恤奚喜又荅陸士衡詩曰顧茲蓬蔚厠根蘭陂膏澤

雖均華不足披逮春不茂未秋先萎子濯鱗翼我挫羽
儀願言難常載合載離昔遊禁閤祇畏夕惕今放邱園
縱心夷易口詠新詩日玩文跡予志耕圃爾勤王役慙
無琬琰以訓尺璧又贈隴西太守張正治詩曰二八由
唐顯周以多士隆群靈感韶運理翮應翔風張生拔幽
華蘋繁登二宮未幾振朱錦剖符撫西戎及子仍同僚
贈言貽爾躬威刑有時用唯德可令終又贈劉佐詩曰
要言將誰苦聊以貽友生念我二三賢規我無隱情又

送大將軍掾盧晏詩曰贈物雖陋薄識意在忘言瓊琚
尚交好桃李貴往還蕭艾苟見納貽我以芳蘭又贈汲
郡太守李茂彥詩曰離索何惆悵後會未可希河朔貴
相忘岐路安足悲又贈長安令劉正伯詩曰遊鸞憑太
虛騰鱗託浮霄過蒙嘉時會假翼陵扶搖疲憊充時乏
及余再同寮並跡侍儲宮攜手登皇朝劉侯撫西都邁
績叅豹喬德厚化必深政明姦自消萬尋由積簣千里
一步超爾其騁逸軌遠塗固可要又荅楊士安詩曰逝

將辭儲宮栖遲集南畿不悞百里賤徒惜年志衰躊躇
顧城闕怨戀慕端闈俊德貽妙詩數藻發清徽媿彼褒
崇過感此岐路悲又贈滎陽太守吳子仲詩曰大晉盛
得人儲宮畜髦士吳侯降高質剖符授千里垂覆豈他
鄉迴光臨桑梓寮類感岐路黎庶思知恥老氏喻小鮮
曹叅寄獄士無謂樊邑陋覆簣由茲起

晉張載贈虞顯度詩曰疇昔協蘭房繾綣在華年嘉好
結平素分著寮友前謂得終遐日綢繆永周旋吾子遭

不造邁閔丁憂艱俾我失良朋誰與吐話言一日為三
秋歲况乃三年離居一何濶結思如迴川

晉石崇贈棗腆詩曰久官無成績栖遲於徐方寂寂守
空城悠悠思故鄉恂恂二三賢身遠屈龍光攜手沂泗
間遂登舞雩堂文藻譬春華談話由蘭芳消憂以觴醴
娛耳以名娼博奕逞妙思弓矢威邊疆

晉司馬彪贈山濤詩曰萑萑倚桐樹寄生於南岳上陵
青雲霓下臨千仞谷處身自孤危於何託余足

晉曹摅贈石崇詩曰涓涓谷中泉鬱鬱巖下林泄泄羣
翟飛咬咬春鳥吟野次何索漠薄暮愁人心三軍望衡
蓋歎息有餘音臨肴忘肉味對酒不能斟人言重別離
斯情効於今

晉劉琨重贈盧諶詩曰時光不我與去乎若雲浮朱實
隕勁風繁英落素秋狹路傾華蓋駭駟摧雙轡何意百
鍊剛化為繞指柔

晉盧諶重贈劉琨詩曰璧由識者顯龍因慶雲翔茨棘

非所憩翰飛遊高岡余音非九韶何以儀鳳皇新城非
芝園曷由殖蘭芳又荅劉琨詩曰隨寶產漢濱摘此夜
光真不待卞和顯自為命世珍

晉裴腆贈石季倫詩曰深蒙君子眷雅顧出羣俗受寶
取諸懷所贈非珠玉凡我二三子執手攜玉腕嘉言從
所好企予結雲漢望風整輕翮因虛舉雙翰朝遊清渠
側日久登高館又荅石崇詩曰昔我不造備嘗顛沛后
土傾基皇天隕蓋少懷蒙昧長無耿介遺訓莫聞出入

靡賴我舅數命于彼徐方載詠陟岡言念渭陽乃泝洪
流汎身餘艗宵寢晨逝曷路之長亦既至止願言以寫
爰有石侯作鎮東夏寬以撫戎從容柔雅我聞有言居
安思危位極則遷勢至必移上德無欲貴道不為妙識
先覺通夢皇羲竊覩堂奧欽蹈明規

晉摯虞荅杜育詩曰越有杜生既文且哲龍躍潁豫有
聲彰澈潁茲三益如琢如切好以義結友以文會豈伊
在高分定傾蓋其人如玉美彼生芻鐘鼓匪樂安用百

壺老夫灌灌離羣索居懷戀結好心焉悵如

晉歐陽建荅棗腆詩曰於鑠我舅明德塞違俾扞東藩
在徐之邳載播其惠載揚其威濟寬以猛方夏以綏光
啓先業增曜重暉咨余冲人艱苦攸離過庭無聞頑固
匪移寔賴茲誨導之軌儀仰遵嘉訓俯蹈明規如葛斯
蔓如樛斯垂我邁君子仰之彌高巖巖其高即之惟溫
居盈思冲在貴忘尊縱酒嘉譙自明及昏無幽不妍靡
與不論人樂其量士感其敦

晉石崇荅賈謏詩曰言念將別覩物傷情贈爾話言要在遺名唯此遺名可以全生

晉杜育贈摯仲治詩曰之子于歸言秣其駒矧乃斯人乃邁乃徂雖非顯甫饒彼百壺雖非張仲將膾河魚人亦有言貴在同音雖曰翻飛曾未異林顧戀同枝增其慨心望爾不遐無金玉音

晉賈據荅阮德猷詩曰友朋顧之貽我良箴玩之無斁終詠斯音燕鼎在舟雖重不沉庶憑嘉謨高迹可尋

宋顏延之贈王太常僧達詩曰玉水記方流璇源載圓
折蓄寶每希聲雖秘猶彰徹聆龍睇九淵聞鳳窺丹穴
歷聽豈多士歸然觀時哲舒文廣國華敷言遠朝烈德
輝灼邦懋芳風被鄉耆側同幽人居郊扉常晝閉林間
時宴開亟迴長者轍庭昏見野陰山明望松雪靜惟浹
群化徂生入窮節豫往誠歡歇悲來非樂闕屬美謝繁
翰遙懷具短札又直東宮荅鄭尚書道于詩曰皇居體
環極設險祇天工兩闌阻通軌對禁限清風

宋鮑昭贈顧墨曹詩曰昏明易遠離會難揆雲撒泉分
西臚東軌

宋鮑令暉題書寄行人詩曰自君之出矣臨軒不解顏
砧杵夜不發高門晝恒闕帳中流熠燿庭前華紫蘭物
枯識節異鴻來知客寒又寄行人詩曰桂吐兩三枝蘭
開四五葉是時君不歸春風徒笑妾

齊王儉贈徐孝嗣詩曰婉婉遊龍載遊載東靡靡行雲
並躍齊蹤無類不感有來斯雍之子云邁嗟我莫從歲

云暮止述職戒行崇蘭罷秀孤松獨貞悲風宵遠乘鴈
晨征撫物遐想念別書情

齊徐孝嗣荅王儉詩曰書帷停月琴袖承飈結芳幽谷
解珮明椒去德滋永懷德滋深行雲傳想歸鴻寄音

齊王融贈族叔衛軍詩曰台曜澄華鉉岳裁峻經天為
象麗地作鎮不器其德有菲斯文質起瑚璉才逸卿雲
搖筆泉瀉動詠雲紛德馨伊何如蘭之宣貞筠抽箭潤
璧懷山六樂畢該五禮備貫七訓是敷三英有粲惟旦

惟公惟公惟旦

齊謝朓夜發新林至京邑贈西府同僚詩曰大江流
日夜客心悲未央徒望關山近終知返路長秋河曙耿
耿寒渚夜蒼蒼引領望京邑宮雉正相望金波麗鵲
玉繩低建章驅車鼎門外思見昭丘陽馳暉不可接何
况隔兩鄉風煙有鳥路江漢限無梁常恐鷹隼擊時菊
委嚴霜寄言尉羅者寥廓已高翔又在郡呈沈尚書詩
曰淮陽股肱守高卧猶在兹况復南山曲何異幽棲時

高閣常晝掩荒堦少諍詞珍簞清夏室輕扇動涼颼夏
李沉朱實秋藕折輕絲良辰竟何許風昔夢佳期坐嘯
徒可積為邦歲已暮

齊陸厥奉荅內兄顧希叔詩曰平原十日飲中散千里
遊渤海方流滯宜城誰獻訓屏居南山下臨此歲方秋
惜哉時不與日暮無輕舟

梁簡文帝贈張纘詩曰儀表咸推挹墻仞難窺踐既富
垂帷學復折波濤辯綺思暖霞飛清文煥飈轉朱旗赫

容與彫榮紛曜煜波搖白鱧舟風動蒼鷹舳九疑勢參
差江天相蔽虧三春澧浦葉九月洞庭枝洞庭枝裏娜
澧浦葉參差芬芳與搖落俱應傷別離

梁沈約訓謝宣城朏詩曰王喬飛鳧烏東方金馬門從
官非宦侶避世非避諠揆予登皇鑒短羽屢飛翻早趨
朝建禮晚沐卧郊園賓至下塵榻憂來命綠樽昔賢侔
時雨今守馥蘭蓀神交疲夢寐路遠隔思存又訓孔
通直懷蓬居詩曰閭闔既洞啓龍樓亦高闢兩宮集鸞

步二閨引通籍伊爾事清塗紛吾供賤役

梁任昉荅劉孝綽詩曰閨水既成瀾藏舟遂移壑彼美洛陽子投我懷秋作久敬類誠言吹噓似嘲謔兼稱夏雲盡復陳秋樹索詎慰耄嗟人徒深老夫託

梁范雲贈沈左衛詩曰伊昔霑嘉惠出入承明宮遊息萬年下經過九龍中越鳥憎北樹胡馬畏南風願言反魚菴津梁肯見通

梁劉孝綽荅張左西詩曰相思如三月相望非兩宮持

此連枝樹暫作背飛鴻若人惠思我摘藻蔚彫蟲仙掌
方晞露靈鳥正轉風方假排虛翮相與北山藜又贈任
中丞詩曰步出金華省遙望承明廬壯哉宛洛池佳麗
實皇居虹蜺拖飛閣蘭芷覆清渠白雲夏峯盡青槐秋
葉疎但願長閒暇酌醴焚枯魚

梁王僧孺贈顧倉曹詩曰洛陽十二門樓闕似西崑暖
燠果愚下相望隔畫垣畫垣向阿閣栖鳳復栖鴛五曹
均趨奏六尚等便煩朝鑪何馥馥夜錦有餘溫日中驅

上駟驤首遍京宛晨趨魏公子夕宿韓王孫夙昔今何在生平棄不論譬如菰菹草心謝葉空存誰復三承睫獨念九飛魂又秋日愁居荅孔主簿詩曰首夏雲物善書暑旦猶清日華隨水汎樹影逐風輕依簾野馬合當戶昔耶生物我一無際人鳥不相驚儻遇北山北聊訪法喬卿又寄何記室詩曰思君不得見望望獨長嗟夜風入寒水曉露拂秋花何由假日御暫得寄風車

梁王均寓直中庶坊贈蕭洗馬詩曰龍樓實九重薄寒

起殊早玉堦泣清露銅池結秋潦霜被守宮槐風驚護
門草之子擅文華縱橫富辭藻舒錦慙光麗握珠謝奇
寶媿予非工文何用披懷抱又東陽還經嚴陵瀨贈蕭
大夫詩曰子陵洵高尚超然獨長往釣石宛如新故態
依可想

梁裴子野荅張貞成臯詩曰匈奴時未滅連年被甲兵
明君思將帥方聽鼓鞞聲吾生姿逸翮撫劍起徂征非
徒慕辛季聊欲逞良平出車既方軌絕幕且橫行豈伊

長纓繫行見黃河清雖令懦夫勇念別猶有情感子盈
編贈握玩以為榮跂子振旅凱舍毫備勒銘

梁蕭子雲贈海法師還甌山詩曰直心好丘壑偏悅幽
棲人忽聞甌山旅萬里自相親沈寥晚霖霽重疊晴雲
新秋至蟬鳴柳風高露起塵動予憶山思惆悵惜荷巾
又寒夜直坊憶袁三公詩曰滴滴雨鳴堦悒悒茲夜靜
風落宣猷樹寒凋承光屏高帷獨曉垂華燭夜空冷所
思不相見方知寒漏永又東郊望春訓王建安雋晚遊

詩曰金塘綠泉滿上園梨蘂落蛺蝶戀殘花黃鸝對妖
萼芳菲滿郊甸惠氣生蘭薄子家冠蓋里我館幽棲郭
綠楊垂長溪便橋限清洛相去能幾許一水終疎索

梁柳惲贈吳筠詩曰寒雲晦滄洲奔潮溢南浦相思白
露亭永望秋風渚心知別路長誰謂若燕楚關侯日遼
絕如何附行旅願作野飛鳥飄然自輕舉又贈吳筠詩
曰山桃落晚紅野蕨開初紫雲日自清明蘋芷齊蘿靡
離念已鬱陶物華復如此又贈吳筠詩曰遠遊濟伊洛

秣馬度清漳邯鄲饒美女艷色含春芳鼓瑟未成曲跼
展復翱翔我本遊客子情愛在淮陽知新誰不樂念舊
苦人傷又贈吳筠詩曰秋風度關隴楚客奏歸音颯颯
避霜葉離離出塞禽

梁何遜落日贈范雲詩曰綠溝綠草蔓扶援雜花舒輕
煙澹柳色重霞掩日餘遙遙長路晚寂寂行人疎又日
夕望江贈魚司馬詩曰湓城帶湓水湓水紫如帶日夕
望高樓耿耿青雲外城中多宴賞絲竹常繁會管聲已

流悅弦聲復悽切歌黛慘如愁舞腰疑欲絕仲秋黃葉
下長風正騷屑早鴈出雲歸故燕辭簷別畫悲在異縣
夜夢還洛汭洛汭何悠悠起望登西樓的的帆向浦團
團日隱洲誰能一羽化輕舉逐飛浮

梁吳筠贈周興嗣詩曰昔賢當路者聲名振華夏朱輪
玳瑁車紫鞵連錢馬朝花舞風中夜月窺窓下想君貴
易朋居然應見捨又入蘭臺贈王治書僧孺詩曰故人
揚子雲校書麟閣下寂寞少交遊紛綸富文雅予為隴

西使寓居洛陽社相思非不深行行避驄馬又荅柳惲
詩曰閒房肅已靜落月有餘暉寒蟲隱壁思秋蛾繞燭
飛絕雲斷更合離禽去復歸佳人今何在迢遞江之沂
一為別竊弄千里淚沾衣又贈任黃門詩曰相如體英
彥左右生容暉已紆漢帝組復解梁王衣經過雲母扇
出入千門扉連洲茂芳杜長山鬱翠微欲言終未敢徒
然獨依依又訓郭臨丞詩曰聞君立名義我亦倦晨征
馬在城上蹀劍自腰中鳴白日遼川暗黃塵墮坻驚願

君但銜酒深知有素誠又訓聞人侍郎詩曰悵然心不
樂萬里向悠悠凌朝憩杜渚泊暮遵江州君住青門上
我發霸陵頭相思自有處春風明月樓又詣周承不值
因贈此詩曰竹枝任風轉蘭心逐風卷青雲葉上團白
露花中泣聞君入綺疎聊寄錦中書一隨平原客寧憶
豫章徐又遙贈周承詩曰巨石亂天崖雜樹鬱參差伯
魚留蜀郡長房還葛陂練練波中月亭亭雲上枝高岑
蔽人者無處得相知又周承未還重贈詩曰石渠間無

人子雲今何在顧望獨疑憂銜杯竟誰待散雪逐吹寒
蓬姿霜雪采甘泉無竹花鷄雛欲還海

陳江總遇長安使寄裴尚書詩曰傳聞合浦葉遠向洛
陽飛北風尚嘶馬南冠獨不歸去雲目徒送離琴手自
揮征蓬失處所春草屢芳菲太息關山月風塵客子衣
賦梁邵陵王贈言賦曰張雲麾聞望之美作牧南蕃維
舟江漢留連飲餞發邁有期會面無日依依別袂恨恨
江干古人贈別以言聊為贈言賦曰昔人有感於知己

情深投分如斯已矣相知勢利之間實君子之所鄙靜
言神交之際亦難得而具美豈真鮮其令終曾未聞其
善始日踰久而益敬蓋惟一人者爾語同志而好合諒
今古之皆然苟託御而自說徐因芻而請前况英聲與
茂實乃絕後而光先似臨潭而對鏡若披霧而覩天欽
愛顧之罔已良佩服之在旃資淑美之上才超羣雄而
獨峻德既深於萬頃壻有高乎數仞思若神而泉湧文
如華而玉振伊薄軀之固陋謬攝官於夏汭知美錦之

難裁處夢絲而易結幸中途而邁止仰旌旆之踟躕似
德星之東邁類祥雲之西徂亟留連於河渚或終宴於
城隅賞既延於賓友懽亦洽於僕夫嗟灰琯之易逝慨
離袂之云促惜日車之不駐恨流影之難續觀善誘而
不倦食好音而未足佇浮雲之可寄願無比乎金玉

梁張纘懷音賦并序曰西平邵陵王以親賢近能作蕃
夏首下走叨竊時命驅傳湘羅久託下風素蒙淑顧及
塗經鄢郢淹泊累旬君王彈隨珠於千仞乃貽之以麗

則詩云懷我好音敢為懷音賦云爾伊宗周之令望巡
召南而述職襟帶鄖夏之鄉宣條江漢之域服詩書於
懷袖抱仁義於曾臆總九德以棲身橫四溟而撫翼循
微躬之末迹謬馳傳於衡嶷由洞庭而左轉指鄴醴而
為期仰芳塵於夏汭路將近而彌滋棹凌波以遄務舟
望浦而倦遲自清光之未覲逾一紀以歷茲敢憑情於
往昔逢君恩之未遺陪桂苑之良遊接蘭臺之高會既
醉酒以飽德亦傾羞而緩帶感平原之愛客傷岐路之

難留戀西園之餘賞泣南浦之徂舟結煩言於將贈情
有盾乎琳球顧龍門其不見過夏首而西浮申服義之
未沫長寄言於還郵

梁陸倕感知已賦贈任昉曰夜申旦而不寐獨匡坐而
怨咨命僕夫而夙駕指南館而為期學窮書府文究辭
林既耳聞而存口又目見而登心似臨淄之借書類東
武之飛翰軫工遲於長卿踰巧速於王粲固乃度平子
而越孟堅何論孔璋而與公幹或欲涉其涯涘求其界

畔則浩浩港港彪彪泚泚譬長缺於鞘中若龍淵與蜀
漢濟濟冠蓋祁祁雋逸有竊風以味道咸交臂而屈膝
或望路以窺門空升堂而入室彼春蘭及秋菊尚無絕
於衆芳矧重仁與襲義信遼遼兮未央言追意而不逮
辭欲書而復忘竊仰高而希驥忽脂車而秣馬既一顧
之我隆亦東壁之余假似延州之如舊同伯喈之倒屣
附蒼蠅於驥尾託明鏡於朝光謂虛無而為有布籍甚
於游揚於是柔條颯其成勁白露變而為霜歲忽忽而

道盡憂與愛兮未忘聚落莖於虛室聽羈雀於枯楊悵
鬱悵其誰語獨撫抱而增傷託異人以蠲憂類其文而
愈疾索黃瓊之寄居造安仁之狹室車出門其已歡無
論銜杯與促膝譬鄒子之吟松故未寒而能慄徒納壤
以作高陋吞舟而為網值墨子之愛兼逢太丘之道廣
陪九萬以齊征激三千而同上識公沙於杵臼拔孝相
於無名非夫人之為惑孰云感於余情指北邙以作誓
期鬱鬱於佳城

梁任昉荅陸倕感知已賦曰原知己之時義故相知之
信然乃貪廉之異貫柰勇怯之相懸貪在物而成累怯
在我而可甄既自得於為御又甘心於執鞭矧相知其
如此獨攬涕而潺湲雖有望於已知更非謂其知己信
偉人之世篤本侯服於陸鄉緬風流與道素襲衮衣與
繡裳逮伊人而世載並三駿而龍光過龍津而一息望
鳳條而載翔彼白玉之雖潔此幽蘭之信芳思在物之
取譬非并斛而能量匹方峙於東嶽比凝厲於秋霜不

一飯以忘過每三錢以投渭匪蒙袂之敢嗟豈溝壑之
能衣既蘊藉其有餘又澹然而無味得意同乎卷懷違
方似乎仗氣類平叔而靡雕似子臺而不朴冠衆善而
胎操綜群言而名學折高戴於后臺異鄒顏乎董握探
三詩於河間訪九師於淮曲術兼口傳之書藝廣鏗鏘
之樂時坐睡而懸梁裁據梧而錐幄唯忘年之陸子定
一過於班荆余獲田蘇之價爾得海上之名信落魄而
無產終長勤於短生饑虛表於徐步逃責顯於疾行子

比我於叔則又方余於耀卿心照情交流言靡惑萬類
聞求千里懸渴言象可廢筌蹄自默居非連棟行待舟
車冬夜不長夏日靡餘肴核非餌絲竹豈娛我未捨駕
子已迴輿中飲相顧悵然動色邦壤雖殊離會難測存
異山陽之居沒非要離之側以膠投漆中離婁豈能識
書後漢崔瑗與葛元甫書曰今遣奉書錢千為贄并送
許子十卷貧不及素但以紙耳


後漢馬融與竇伯向書曰孟陵奴來賜書見手跡歡喜

何量次於面也書雖兩紙紙八行行七字七八五十六字百三十二言耳

後漢延篤荅張奐書曰惟別三年夢想言念何日有違伯英來惠書盈四紙讀之三復喜不可言

後漢張奐與陰氏書曰篤念既密文章燦爛名實相副奉讀周旋紙弊墨渝不離于手

晉庾冰與王羲之書曰得示連紙一丈致辭一千祇增其數耳了無解於往懷



藝文類聚卷三十一

欽定四庫全書

子部

藝文類聚卷三十二

詳校官中書_臣李彤

員外郎_臣牛稔文覆勘

總校官知縣_臣楊懋珩

校對官中書_臣李荃

膳錄監生_臣孫慰祖

欽定四庫全書

藝文類聚卷三十二

唐

歐陽詢

撰

人部十六

閨情

閨情

毛詩曰自伯之東首如飛蓬豈無膏沐誰適為容又
曰角枕粲兮錦衾爛兮予美忘此誰與獨旦又曰我
徂東山滔滔不歸我來自東零雨其濛鸛鳴于垤婦
歎于室又曰采綠刺怨曠也幽王之時多怨曠者終

朝采綠不盈一朶子髮曲局薄言歸沐終朝采藍不
盈一襜五日為期六日不詹又曰靜女其姝俟我於
城隅愛而不見搔首踟躕又曰燕爾新婚如兄如弟
又曰未見君子憂心忡忡亦既見止亦既覯止我心
則降又曰未見君子憂心惓惓亦既見止亦既覯止
我心則悅

左傳晉叔向曰昔賈大夫惡娶妻而美三年不言不笑
御以如臯射雉獲之其妻始笑而言又晉文公謂季隗

曰待我二十五年不來而後嫁季隗曰我二十五年矣
又如是而嫁則就木焉

說苑曰齊王起九重之臺募國中能畫者賜之錢有敬
君居常飢寒其妻妙色敬君工畫臺貪賜畫臺去家日
久思憶其妻畫像向之而笑傍人見以白王王召問之對
曰有妻如此去家日久心常念之竊畫其像以慰離心
不悟上聞

漢張敞為婦畫眉帝知問之敞曰閨房之內夫婦之私

有過此者又李夫人得幸武帝而卒上憐憫焉圖畫其像於甘泉宮初李夫人病篤上自臨候之夫人蒙被謝曰妾久寢病形貌毀壞不可以見帝上曰夫人病亦甚殆將不起一見我屬託兄弟豈不快哉夫人曰尊官在帝不在一見上復言欲必見之夫人遂轉面向壁歔歔上不悅而起夫人姊妹讓之曰獨不可一見上屬託兄弟耶夫人曰不見帝者乃欲深託兄弟也夫以色事人者色衰則愛弛上所戀戀念我以平生容貌也今見我

毀壞顏色非昔必且畏惡我尚肯思復錄其兄弟哉

風俗通曰有張伯偕仲偕兄弟形貌絕相類仲偕妻新粧竟忽見伯偕乃戲問曰今日粧飾好不伯偕應之曰我伯偕也妻乃趨避之須臾又見伯偕猶以為仲偕告云向大錯誤伯偕曰我故伯偕也

世說曰王渾妻鍾夫人每嘗卿渾渾曰詎可爾妻曰憐卿愛卿是以卿卿我不卿卿誰當卿卿又曰荀奉倩妻曹氏有艷色妻常病熱奉倩乃出中庭取冷還以身熨之

妻亾人弔不哭而神傷無幾奉倩亦卒又曰孫楚妻亾
至祥仍為詩以悼之王武子見其文曰未知文生於情
情生於文見此使人增伉儷之重

湘州記曰舜巡狩蒼梧而崩二妃不從思憶舜以淚染
竹竹盡為斑

詩古詩曰青青河畔草鬱鬱園中柳盈盈樓上女皎皎
當牕牖
綫綫紅粉粧纖纖出素手昔為娼家女今為蕩
子婦蕩子行不歸空牀難獨守又曰上山採蘼蕪下山

逢故夫長跪問故夫新人復何如新人雖云好未若故
人姝顏色似相類手爪不相如新人從門入故人從閤
去新人工織縑故人工織素織縑日一匹織素五丈餘
持縑將比素新人不如故又曰蘭若生春陽涉冬猶盛
滋願言追昔愛情款感四時美人在雲端天路隔無期
後漢焦仲卿妻劉氏為姑所遣時人傷之作詩曰孔雀
東南飛五里一徘徊十三能織綺十四學裁衣十五彈
箏篴十六學誦詩十七嫁為婦心中常苦悲君既為府

吏守節情不移雞鳴入機織夜夜不得息三日斷五疋
大人故言遲非為織作遲君家婦難為妾有繡腰襦歲
蕤金縷光紅羅複斗帳四角垂香囊交文象牙簟宛轉
素絲繩鄙賤雖可薄猶中迎故人

魏陳王曹植詩曰攬衣出中閨逍遙步兩楹閒房何寂
寥綠草被堦庭空穴自生風百鳥翩南征春思安可忘
憂戚與君并佳人在遠道妾身單且歡會難再遇芝
蘭不重榮人皆棄舊愛君豈若平生寄松為女蘿依水

如浮萍齋身奉衿帶朝夕不墮傾儻終顧眄恩永副我
中情又曰明月照高樓流光正徘徊上有愁思婦悲歎
有餘哀借問歎者誰云是宕子妻君行踰十年孤妾常
獨棲君若清路塵妾若濁水泥浮沉各異勢會合何時
諧願為西南風長逝入君懷君懷時不開妾心將何依
又曰西北有織婦綺縞何繽紛明晨秉機杼日晏不成
文太息終長夜悲嘯入青雲妾身守空房良人從行軍
自期三年歸今已歷九春孤鳥繞樹翔嗷嗷鳴索羣願

為南流景馳光見我君

魏徐幹室思詩曰浮雲何洋洋願因通我辭一逝不可
歸嘯歌久踟躕人離皆復會我獨無反期自君之出矣
明鏡暗不治思君如流水何有窮已時

晉潘岳內顧詩曰靜居懷所歡登城望四澤春草鬱青
青桑柘何奕奕芳林振丹榮淥水激素石初征冰未泮
忽焉袵絺綌漫漫三千里迢迢遠行客馳情戀朱顏寸
陰過盈尺夜愁極清晨朝悲終日夕山川自悠永願言

良不獲別嶺訴歸期雲沉不可釋

晉陸機為陸思遠婦作詩曰二合兆嘉偶女子禮有行
潔已入德門終遠母與兄如何耽時寵遊宦忘歸寧雖
為三載婦顧景媿虛名歲暮饒悲風洞房涼且清拊枕
循薄質非君誰見榮離君多悲心寤寐勞人情敢忘桃
李陋側想瑤與瓊又擬青青河畔草詩曰靡靡江離草
熠熠生河側皎皎彼姝女婀娜當軒織粲粲嬌容姿灼
灼美顏色良人遊不歸偏棲獨隻翼空房來悲風中夜

起歎息又擬蘭若生春陽詩曰嘉樹生朝陽凝想封其
條執心守時信歲寒終不凋美人何其曠的的在雲霄
晉張華情詩曰北方有佳人端坐鼓鳴琴終晨撫管絃
日久不成音憂來結不解我思存所欽又情詩曰君居
北海陽妾在江南陰懸邈極修途山川阻且深承歡注
隆愛結分投所欽銜恩守篤義萬里託微心又詩曰遊
目四野外逍遙獨延佇蘭蕙緣清渠繁華蔭綠渚佳人
不在茲取之欲誰與巢居知寒風穴處知陰雨不曾遠

別離安知慕儔侶

宋孝武帝擬空思詩曰自君之出矣金翠闇無精思君如日月迴還晝夜生

宋江夏王義恭擬詩曰自君之出矣綺錦廢不開思君如清風曉夜嘗徘徊

宋顏師伯擬詩曰自君之出矣芳帷低不舉思君如迴雪流亂無端緒

齊王融秋胡詩曰日月共為照松筠俱以貞佩紛甘自

遠結鏡待君明且協金蘭好方愉琴瑟情佳人忽千里
空閨積思生

梁簡文帝詠人棄妾詩曰昔時嬌玉步含羞花燭邊豈
言心愛斷銜啼私自憐但覺歡成怨非關醜易妍獨鵠
罷中路孤鸞死鏡前又春宵詩曰花樹含春藂羅帳夜
長空風聲隨篠韻月色與池同綵牋徒自襞無信往雲
中又曉思詩曰晨禽爭學囀朝花亂欲開鑪煙入斗帳
屏風隱鏡臺紅粧幾盡淚蕩子何當來又冬曉詩曰冬

朝日照梁含怨下前牀帷褰竹葉帶鏡轉菱花光會是
無人見何用早紅粧又秋閨夜思詩曰非關長信別詎
是良人征九重忽不見萬恨滿心生夕門掩魚鑰宵牀
悲畫屏迴月臨階度吟蟲繞砌鳴初霜隕細葉秋風吹
亂螢故粧猶累日新衣製未成欲知妾不寐城外搗砧
聲又倡樓怨節詩曰朝日斜來照戶春鳥爭飛出林片
光片影皆麗一聲一轉煎心上林紛紛花落淇水漠漠
苔浮年馳節流易盡何為忍意含羞又春別詩曰別觀

蒲萄帶實垂江南豈蒨生連枝無情無意又如此有心
有恨徒別離又詩曰可憐淮水去來潮春隄楊柳覆河
橋淚痕未燥詎終朝行聞玉佩已相要又詩曰桃紅李
白若朝粧羞持憔悴比新芳不惜暫住君前死愁無西
國更生香

梁元帝寒閨詩曰烏鵲夜南飛良人行未歸池水浮明
月寒風送搗衣願織迴文錦因君寄武威又閨怨詩曰
蕩子從遊宦思妾守房櫳塵鏡朝朝掩寒牀夜夜空若

非有懽悅何事久西東知人相望否淚盡夢啼中又代
舊姬閨怨詩曰寧為萬里隔乍作死生離那堪眼前見
故愛逐新移未展春花落遽被涼風吹怨黛舒還歛啼
紅拭復垂誰能巧為賦黃金妾不貲又別詩曰昆明夜
月光如練上林朝花色如霰花朝月夜動春心誰忍相
思今不見又詩曰試看機上蛟龍錦還瞻庭裏合歡枝
映日通風影珠幔飄花拂葉度金池不聞離人當重合
唯悲合罷會成離又詩曰門前楊柳亂如絲直置佳人

不自持適言新作裂紈詩誰悟今成織素辭又詩曰日
暮徙倚渭橋西正見流月與雲齊若使月光無近遠應
照離人今暝啼又詩曰別罷花枝不共攀別後書信不
相關欲覓行人寄消息依常潮水暝應還又詩曰三月
桃花合面脂五月新油好煎澤莫復臨時不寄人漫道
江中無估客

梁武陵王蕭紀夜夢詩曰昨夜夢君歸賤妾下鳴機極
知意氣薄不著去時衣故言如夢裏賴得鴈書飛

梁范雲擬古詩曰自君之出矣羅帳咽秋風思君如蔓草連延不可窮

梁王僧孺為何遜舊姬擬上山采蘼蕪詩曰出戶望蘭薰褰簾正逢君歛容裁一訪新人詎可聞新人含笑近故人含淚隱妾意在寒松君心逐朝槿又為姬人怨詩曰自知心裏恨還向影中羞迴持昔慊慊變作今悠悠還君與妾扇歸妾與君裘絃斷猶可續心去竄難留又為人傷近而不見詩曰羸女鳳皇樓漢姬柏梁殿詎勝

仙將死音容猶可見獨我一心人同鄉不異縣異縣不
成隔同鄉更脉脉脉脉如牛女幽幽寄一語又作寵姬
詩曰及君高堂還值妾妍粧罷曲房褰錦帳迴廊步珠
屐玉釵時可挂羅襦詎難解再顧連城易一眄千金買
又詠姬人詩曰窈窕守容華但歌有情曲轉眄非無以
斜眉幸相矚不減許飛瓊多勝劉璧玉何因送款款半
飲杯中醪

梁蕭子顯春別詩曰翻鸞度燕雙比翼楊柳千條共一

色但看陌上攜手歸誰能對此空中憶又詩曰幽宮積
草自芳菲黃鳥芳樹情相依爭風竟日常聞響重花疊
葉不通飛當知此時動妾思暫使罷袂拂君衣又詩曰
銜悲攬涕別心知桃花李花任風吹本知人心不似樹
何意人別似花離

梁劉綏閨怨詩曰別後春池異荷盡欲生冰箱中剪刀
冷臺上面脂凝纖腰轉無力寒衣怨不勝又秋閨詩曰
樓上起秋風絕望秋閨中燭溜花行滿香然奩欲空徒

交兩行淚俱浮粧上紅

梁吳筠閨怨詩曰胡笳屢悽斷征蓬未肯還妾坐江之
介君戍小長安相去三千里參差書信難四時無人見
誰復重羅紉又閨怨詩曰春草可攬結妾心正斷絕綠
鬟愁中改紅顏啼裏滅非獨淚如珠亦見珠成血願為
飛鵲鏡翩翩照離別又古意詩曰賤妾思不堪採桑渭
城南帶減連枝繡髮亂鳳皇替花舞依長薄驚飛愛淥
潭無由報春信流涕向春蠶

梁庾肩吾春宵詩曰征人別來久年芳復臨牖燭下夜
縫衣春寒偏著手願及歸飛鴈因書向高柳又冬曉詩
曰鄰雞聲已傳愁人竟不眠月光侵曙後霜明落曉前
縈鬟起照鏡誰忍插花鈿

梁劉孝綽春宵詩曰春宵猶自長春心非一傷月帶園
樓影風飄花樹香誰能對雙燕暝暝守空牀又冬曉詩
曰冬曉風正寒偏念客衣單臨粧罷鉛黛含淚剪綾紈
寄語龍城下詎知書信難又古意詩曰燕趙多佳麗白

日照紅粧蕩子十年別羅衣雙帶長春樓怨難守玉堦
悲自傷對此歸飛燕銜泥繞曲房差池入綺幕上下傍
雕梁故居猶可念故人安可忘徒然顧枕席誰與同衣
裳空使蘭膏夜炯炯對繁霜

梁何遜閨怨詩曰曉河沒高棟斜月半空庭牕中度落
葉簾外隔飛螢含情下翠帳掩涕閉金屏昔期今未反
春草寒復青思君無轉易何異北辰星又詠倡婦詩曰
曖曖高樓暮華燭帳前明羅帷雀釵影寶瑟鳳雛聲夜

花枝上發新月霧中生誰念當牕牖相望獨盈盈

梁費昶長門怨詩曰向夕千悲起百恨何嗟及愁思且
歸牀羅襦方掩泣絳樹搖風軟黃鳥弄聲急金屋貯嬌
時不言君不入

梁劉孝儀閨怨詩曰本無金屋寵長作玉階悲一乖西
北麗寧復城南期永巷愁無歇應門閉有時空勞織素
巧徒為團扇詞匡牀終不共何由橫自私

梁劉孝威春宵詩曰花開人不歸節暖衣須變迴釵挂

反鑲拭淚繩春線今夜月輪圓胡兵必應戰又冬曉詩
曰妾家遶洛城慣識曉鍾聲鍾聲猶未盡漢使報應行
天寒硯水凍心悲書不成

梁劉孝先春宵詩曰夜樓明月弦露下百花鮮情多意
不設啼罷未歸眠燉煌定若遠一信動經年又冬曉詩
曰晨霞影翠帷思婦織霜絲經寒牽杼澁釧冷調梭遲
乍廢倡樓粉貪赴遠人期

梁王筠閨情詩曰月出宵將半星流曉未央空閨易成

響虛室自生光嬌羞悅人夢猶言君在傍又向曉閨情
詩曰北斗行欲沒東方稍已晞晨雞初下棲曉露上霑
衣衾裯徒有設信誓果相違詎忍開朝鏡羞恨掩空扉
又春遊詩曰叢蘭已飛蝶楊柳半藏鴟物色相煎蕩微
步出東家既同翡翠翼復如桃李花欲以千金笑迴君
流水車

梁陸罩詩曰自憐斷帶日偏恨分釵時留步惜餘影含
意結愁眉徒知今異昔空使怨成思欲以別離意獨向

靡蕪悲

梁鮑泉寒閨詩曰行人消息斷空閨靜復寒風急朝機
燥鏡暗晚粧難從來腰自小衣帶就中寬

梁鄧鏗閨怨詩曰暫別猶添恨何忍別經時蕞桂頻銷
葉庭樹幾攀枝君言妾貌改妾畏君心移終須一相見
併得兩心知又月夜閨中詩曰閨中日已暮樓上月初
華樹陰緣砌上牕影向牀斜開屏為察書卷帳照垂花
誰能當此夕獨處類倡家

梁蕭子暉春宵詩曰夜夜妾偏栖百花含露低蟲聲繞
春岸月色思空閨倩語長安驛辛苦寄遼西又冬曉詩
曰步欄光欲通曙鳥向西東燭滅傳餘氣帷香開曉風
繁花無處盡還銷寒鏡中

梁劉邈秋閨詩曰螢飛倚牕外妾思霍將軍燈前量獸
錦簷下織花紋墜露如輕雨長河似薄雲秋還百種事
衣成不暇熏

梁蕭子雲春思詩曰春風蕩羅帳餘花落鏡奩池荷正

卷葉庭柳復垂簷竹柏君自改團扇妾方嫌詎能憐故
素終為泣新縑

梁何思澄古意詩曰故交不可忘猶如蘭桂芳新知雖
可悅不異茱萸香妾有鳳皇曲非無陌上桑薦君君不
御抱瑟自悲涼

梁朱越賦得蕩子行未歸詩曰坐樓愁出望息意不思
春無奈園中柳寒時已報人捉梳羞理鬢挑朱懶向唇
何當上路晚風吹還騎塵

陳陰鏗南征閨怨詩曰湘水舊言深征客理難尋獨愁
無處道長宵不自禁逢人憎解佩從來懶聽音唯當有
夜鵲南飛似妾心又秋閨怨詩曰獨眠雖已慣秋來只
自愁火籠恒暖脚行障鎮牀頭眉含黛俱歛啼將粉共
流誰能無限別唯守一空樓

陳李塤山家閨怨詩曰山中多早梅荆扉達曙開竹巾
君自折荷衣誰為裁行雲無處所人住在陽臺

陳張正見山家閨怨詩曰王孫春好遊雲鬢不勝愁離

鴻暫罷曲別路已經秋山中桂花晚勿為俗人留又賦
得佳期竟不歸詩曰良人萬里向河源倡婦三秋思柳
園路遠寄詩空織錦宵長夢反欲驚魂飛蛾屢繞帷前
燭衰草還侵階上玉銜啼拂鏡不成粧促柱繁絃還亂
曲時忿年移竟不歸偏憎信急夜縫衣流螢映月明空
帳疎葉從風入斷機自對孤鸞向影絕終無一鴈帶書
飛

陳徐湛賦得班去趙姬升詩曰班姬與飛燕俱侍漢王

宮不意思情歇偏將衰草同香飛金輦外苔上玉階中
今日悲團扇非是為秋風

陳江總賦得空閨怨詩曰蕩妻怨獨守盧姬傷獨居瑟
上調絃落機中織素餘自羞淚無燥翻覺夢成虛復嗟
長信閣寂寂往來疎又為姬人怨服散詩曰天寒海水
慣相知空牀明月不相宜庭中芳桂憔悴葉井上疎桐
零落枝寒燈作花羞夜短霜鴈多情恒結伴非為隴水
望秦川直置思君腸自斷薄命夫壻好神仙逆愁高飛

向紫煙金丹欲成猶百鍊玉酒新熟幾千年妾家邯鄲
好輕薄特忿仙童一九藥自悲行處綠苔生何悟啼多
紅粉落莫輕小婦狎春風羅襪也得步河宮雲車欲駕
應相待羽衣未去幸須同不學蕭史還樓上會逐姮娥
戲月中又聞怨詩曰寂寂青樓大道邊紛紛白雪綺窓
前池上鴛鴦不獨宿帳中蘇合還空然屏風有意障明
月鐙火無情照獨眠遼西水凍春應少薊北鴻來路幾
千願君關山及早度念妾桃李片時妍又詩曰蜘蛛作

絲滿帳中芳草結葉當行路紅臉脉脉一生啼黃鳥飛
飛有時度故人雖故昔經新新人雖新復應故

賦梁元帝蕩婦秋思賦曰蕩子之別十年倡婦之居自
憐登樓一望唯見遠樹含煙平原如此不知道路幾千
天與水兮相逼山與雲兮共色山則蒼蒼入漢水則涓
涓不測誰復堪見鳥飛悲鳴隻翼秋何月而不清月何
秋而不明况乃倡樓蕩婦對此傷情於時露萎庭蕙霜
封堦砌坐視帶長轉看腰細重以秋水文波秋雲似羅

日黯黯而將暮風騷騷而渡河妾怨迴文之錦君思出
塞之歌相思相望路遠如何髣髴蓬而漸亂心懷愁而
轉歎愁縈翠眉斂啼多紅粉漫已矣哉秋風起兮秋葉
飛春花落兮春日暉春日遲遲猶可至客子行行終不
歸

梁江淹倡婦自悲賦曰日自趙東來舞漢宮瑤席金陳
桂枝嬌春素壁翠樓明月徒秋歌聲忽散倡人復愁君
王更衣露色未晞侍青鑾以雲徒夾丹輦以霞飛願南

山之無隙指壽陵以同歸俄而綠衣坐奮白華卧進屑
骨不憐抵金誰恠九重以閉高門自蕪青苔積兮銀閣
澁網羅生兮玉梯虛度九冬而廓處經十秋而分居傷
營魄之已盡畏松柏之無餘去柏梁以掩袂出桂柱而
歛眉視朱殿以再暮撫巔華而一疑

周庾信蕩子賦曰蕩子辛苦逐征行直守長城千里城
隴水恒冰合關山唯明月况復空牀起怨倡婦生離紗
牕獨掩羅帳長垂新箏不弄長笛羞吹常年桂苑昔日

蘭閨羅敷總髮弄玉初筭新歌子夜舊舞前溪別後關
情無復情奩前明鏡不須明合歡無信寄迴紋織未
成遊塵滿牀不用拂細草橫階隨意生前日漢使著章
臺聞道夫壻定應迴手巾還欲燥愁眉即剩開逆想行
人至迎前含笑來

書後漢秦嘉與妻書曰不能養志當給郡使隨俗順時
俛俛當去知所苦故爾未有瘳損想念悵悵勞心無已
當涉遠路趨走風塵非志所慕憊憊少樂又計往還將

彌時節念發同怨意有遲遲欲暫相見有所屬託今遣
車往想必自力

秦嘉妻徐淑荅書曰知屈珪璋應奉臧使策名王府觀
國之光雖失高素皓然之業亦是仲尼執鞭之操也自
初承問心願東還迫疾惟宜抱歎而已日月已盡行有
伴例想嚴裝已辦發邁在近誰謂宋遠企予望之室過
人遐我勞如何深谷逶迤而君是涉高山巖巖而君是
越斯亦難矣長路悠悠而君是踐冰霜慘烈而君是履

身非形影何得動而輒俱體非比目何得同而不離於
是詠萱草之喻以消兩家之恩割今者之恨以待將來
之歡今適樂土優游京邑觀王都之壯麗察天下之珍
妙得無目玩意移往而不能出耶

嘉重報妻書曰車還空反甚失所望兼敘遠別恨恨之
情頗有悵然間得此鏡既明且好形觀文彩世所希有
意甚愛之故以相與并寶釵一雙好香四種素琴一張
常所自彈也明鏡可以鑒形寶釵可以耀首芳香可以

馥身素琴可以娛耳

妻又報嘉書曰既惠音令兼賜諸物厚顧慙慙出於非
望鏡有文彩之麗釵有殊異之觀芳香既珍素琴益好
惠異物於鄙陋割所珍以相賜非豐恩之厚孰肯若斯
覽鏡執釵情想髣髴操琴詠詩思心成結勅以芳香馥
身喻以明鏡鑒形此言過矣未獲我心也昔詩人有飛
蓬之感班婕妤有誰榮之歎素琴之作當須君歸明鏡
之鑒當待君還未奉光儀則寶釵不列也未侍帷帳則

芳香不發也

梁何遜為衡山侯與婦書曰昔人邀遊洛汭會遇陽臺
神仙髣髴有如今別離帳前微笑涉想猶存而幄裏餘
香從風且歇掩屏為疾引領成勞鏡想分鸞琴悲別鶴
心如膏火獨夜自煎思等流波終朝不息始知萋萋萱
草忘憂之言不實團團輕扇合歡之用為虛路邇人遐
音塵寂絕一日三秋不足為喻聊陳往翰寧寫款懷遲
枉瓊瑤慰其杼軸

周庾信為上黃侯世子與婦書曰昔仙人道引尚刻三
秋神女將梳猶期九日未有龍飛劍匣竊別琴臺莫不
銜怨而心悲聞猿而下淚人非新市何處尋家別異邯
鄲那應知路想鏡中看影當不含啼欄外將花居然俱
笑分杯帳裏却扇牀前故是不思何時能憶當學海神
逐潮風而來往勿如織女待填河而相見

陳伏知道為王寬與婦義安主書曰昔魚嶺逢車芝田
息駕雖見妖姪終成揮忽遂使家勝陽臺為歡非夢人

慙蕭史相偶成仙輕扇初開欣看笑靨長眉始畫愁對
離粧猶聞徙佩顧長廊之未盡尚分行憶冀迥陌之難
迴廣攝金屏莫令愁擁恒開錦幔速望人歸鏡臺新去
應餘落粉燠鑪未徙定有餘煙淚滴芳衾錦花長濕愁
隨玉軫琴竊恒驚已覺錦水丹鱗素書稀遠玉山青鳥
仙使難通綵筆試操香牋遂滿行雲可託夢想還勞九
重千日詎想倡家單枕一宵便如蕩子當令照影雙來
一鸞羞鏡勿使窺窓獨坐姮娥笑人

藝文類聚卷三十二

欽定四庫全書

藝文類聚卷三十三

唐 歐陽詢 撰

人部十七

寵幸
報恩

遊俠
盟

寵幸

左傳曰申侯有寵於楚文王文王將死與之璧使行
曰唯我知汝汝專利而不厭我死汝必速行無適小
國將不容汝焉既葬出奔鄭又寵於厲公又曰公子
佗有白馬四宋公嬖向魍魎欲之公取而朱其尾鬣

以與之佗怒使其從奪之魑懼將走公閉門而泣之目盡腫

韓子曰彌子瑕有寵於衛國衛國法竊駕君車罪刑子瑕之母病其人有夜告彌子彌子矯駕君車以出君聞而賢之曰孝哉為母之故犯刑罪異日與君遊於果園食桃而甘以其餘獻君君曰愛我忘其口啖寡人

戰國策曰楚王游雲夢結駟千乘旌旗蔽日野火之起若雲蜺兕虎之嘑若雷霆有狂兕依輪而王親扞弓而

射之一發而殪王仰天而笑曰樂矣今日之遊也寡人萬歲千秋之後誰與同樂此矣安陵君纏泣數行而進曰臣入則侍席出則陪乘大王萬歲千秋之後臣願以身抵黃泉驅螻蟻又何得此樂而樂之大王悅而封纏為安陵君又曰魏王與龍陽君共船而釣龍陽君涕下王曰何為泣曰為臣之所得魚也王曰何謂也對曰臣之所得魚也臣甚喜後得又益大臣欲棄前所得魚矣今以臣之醜惡而得為王拂枕席今四海之內美人亦

甚多矣聞臣之得幸於王也必褰裳趨王臣亦曩之所
得魚也亦將棄矣臣安能無涕出乎魏王於是布令於
四境之內曰敢言美人者滅族

漢書曰漢興佞幸寵臣高祖時則有籍孺孝惠時閼孺
此兩人非有材能但以婉媚貴幸與上卧起公卿皆因
門閼故孝惠時郎侍中皆冠鷄鶡具帶傅脂粉皆閼籍
之屬也又曰鄧通為黃頭郎文帝夢上天不能有一黃
頭郎推助之及顧其衣裳後穿寐覺而之漸臺以夢中

陰自求推者見鄧通其衣後穿夢中所見也召問甚悅
尊異之通亦愿謹不好外交雖賜洗沐不欲出於是文
帝賞賜通鉅萬以十數賜通蜀嚴道銅山得自鑄錢又
曰韓嫣武帝為膠東王時與上學相愛及上為太子愈
益親嫣善騎射聰惠上即位欲事伐胡而嫣先習兵以
故益尊貴賞賜擬鄧通常與上共卧起又曰李延年歌
為變聲是時欲造樂令司馬相如等作詩延年輒承意
弦歌所造詩謂之新聲曲由是為協律都尉佩二千石印

綬而上與之卧起其愛幸與韓嫣同又曰金日磾子賞
建二人皆愛幸為武帝弄兒常在旁昭帝時日磾兩子
俱侍中與昭帝略同年共卧起賞為奉車都尉建為駙
馬都尉又曰張放鴻嘉中宣帝欲遵武帝故事與近臣
遊宴放以公主子日數得幸取皇后弟平恩侯許嘉女
上為放供帳賜甲第充以乘輿服飾號為天子取婦皇
后嫁女兩宮使者冠蓋不絕賞賜以千萬放與上卧起
寵愛殊絕又曰董賢為郎傳漏正殿下賢為人美麗哀

帝望見悅其儀貌識而問之曰是舍人董賢耶因引上與語拜為黃門郎由是始幸賢寵日甚為駙馬都尉侍中出則參乘入御左右旬月間賞賜累鉅萬常與上卧起晝寢偏藉上衣袖上欲起賢未覺不欲動賢乃斷袖而起其愛恩至此

魏志曰孔挂性便妍曉博奕蹋鞠太祖愛之每在左右出入隨從挂察太祖意歡樂因言吹曲有所陳事多見從數得賞賜又多饋遺挂由此侯服王食太祖既愛挂

五官將及諸侯亦皆親之又曹毗曹肇傳曰肇魏明帝寵愛之寢止恒同常與帝戲賭衣物有不獲輒入御帳服之徑出其見親寵類此比也

俗說曰桓玄寵丁期朝賢論事賓客聚集恒在背後坐食畢便迴盤與之期雖被寵而謹約不敢為非玄臨死之日期乃以身捍刃

詩魏阮籍詩曰昔日繁華子安陵與龍陽天天桃李花灼灼有輝光悅澤若九春罄折似秋霜流眄發姿媚言

笑吐芬芳携手等歡愛宿昔同衾裳

晉張翰周小史詩曰翩翩周生婉孌幼童年十有五如
日在東香膚柔澤素質叅紅團輔圓頤茁茁芙蓉爾形
既淑爾服亦鮮輕裾隨風飛霧流烟轉側綺靡顧眄便
妍和顏善笑笑美口善言

梁吳筠詠少年詩曰董生唯巧笑子都信美目百萬市
一言千金買相逐不道參差菜誰論窈窕淑願君捧繡
被來就越人宿

梁劉遵繁華詩曰可憐周小童微笑摘蘭蕋鮮膚勝粉
白睜臉若桃紅挾彈雕陵下垂鉤蓮葉東腕動飄香麝
衣輕任好風幸承拂枕選侍奉畫堂中本知傷輕薄含
辭羞自通翦袖恩雖重殘桃愛未終蛾眉詎須嫉新粧
近入宮

論梁沈約宋書恩幸傳序論曰夫人君南面九重奧絕
陪奉朝夕義隔卿士階闥之任宜有司存既而恩以狎
生信由恩得無可憚之姿有易親之色孝建泰始主威

獨運空置百司權不外假而刑政糾雜理難徧通耳目
所寄事歸近習賞罰之要是謂國權出內王命由其掌
握於是方塗結軌輻輳同奔人主謂其身卑位薄以為
權不得重曾不見鼠憑社貴狐藉虎威外無逼主之嫌
內有專用之功勢傾天下未之或悟挾朋樹黨政以賄
成鈇鑕創痛構於牀第服冕乘軒出乎言笑之下西京
許史蓋不足云晉朝王石未或能及太宗晚運屢經盛
衰權倖之徒惴惴宗戚欲使幼主孤立永竊國權構造

異同興樹禍隙帝弟宗王相繼屠戮民忘宋德雖非一
塗寶祚夙傾實由於此嗚呼哀哉

遊俠

列子曰虞氏者梁之富民也家既充盛錢金無量財貨
無貲登高樓臨大路設樂陳酒擊搏樓上俠客相隨而
行樓上博者大笑鳶飛適墜其腐鼠而中之俠客曰虞
氏福樂之日久矣常有輕易人之志乃辱我以腐鼠率
徒屬而滅其家

史記曰甯成抵罪得脫乃詐刻傳出關歸家稱曰仕不至二千石賈不至千萬安可比人乎乃貰貸買陂田千餘頃役使數千家數年產至千金為任俠其役民重於郡守

淮南子曰北楚有任俠者其子孫數止之不聽縣有賊大搜其廬事果發覺夜驚而走追及之其所施德者皆為之戰得免反謂其子曰汝數止吾俠今有難皆賴而身免汝諫不可用也

戰國策曰韓僇嚴遂事於君二人相害嚴遂正議直指
舉韓僇之過拔劍趨之嚴遂懼誅亡去求人可以報韓
僇者至齊陰交聶政以意厚之政母死既葬除服曰嗟
乎政乃市井之人鼓刀之屬而嚴仲子不遠千里枉車
騎而交臣舉金為親壽是深知政也至濮陽見嚴仲子
曰前所以不許子者徒以親在今親已亡仲子所欲報
者為誰嚴仲子具告曰臣之仇韓僇政遂獨行仗劍至
韓直入刺僇僇走而抱哀侯政刺之兼中哀侯左右大

亂

漢書曰戰國合縱連衡力政爭強繇是列國公子魏有
信陵趙有平原齊有孟嘗楚有春申皆藉王公之勢競
為遊俠雞鳴狗吠無不賓禮而談者以四豪而稱首又
曰季布為任俠有名項籍使將兵數窘漢王項籍滅高
祖購求布千金敢匿罪三族布匿濮陽周氏乃髡鉗布
衣褐置廣柳車中并與其家僮數十人之魯朱家所賣
之朱家心知其季布也買置田舍乃之洛陽見汝陰侯

滕公說曰季布何罪臣各為其主用職耳項氏臣豈可盡誅也今上始得天下而以私怨求一人何示不廣也且以季布之賢漢求之急如此此不北走胡南走越耳夫忌壯士以資敵國此伍子胥所以鞭荊王之墓也君何不從容為上言之滕公心知朱家大俠意布匿其所乃許諾侍間果言如朱家上乃赦布又曰季布弟季心氣蓋閭中遇人謹恭為任俠方數千里士爭為死嘗殺人亡吳從爰絲匿長事爰絲弟畜灌夫籍福之屬少年

多待之藉其名以行當是時季布以信聞關中又鄭當
時為任俠自喜孝景時為太子舍人每五日洗沐常置
驛馬長安諸郊請謝賓客夜以繼日至明旦常恐不徧
其知友皆天下有名之士也又曰丞相公孫賀子敬聲
以皇后姊子驕奢擅用北軍錢千九百萬發覺下獄是
時詔捕陽陵朱安世不能得上求之急賀自請逐捕安
世以贖敬聲罪上許之後果獲安世安世者京師大俠
也聞賀欲以贖子笑曰丞相禍及宗矣南山之竹不足

受我辭斜谷之木不足為我械安世從獄中告敬聲與
陽石公主私通及使巫祭祠當道理偶人祝詛有惡言
下有司案驗賀父子死獄中又曰灌夫為人剛直使酒
不好面諛權貴勢在已右者必陵之在左者愈貧賤尤
益禮敬稠人廣衆薦寵下輩士以此多歸之又曰劇孟
以俠顯吳楚反時條侯為太尉乘傳東將至河南得劇
孟喜曰吳楚舉大事而不求劇孟吾知其無能為也天
下騷動大將得之若一敵國劇孟行大類朱家及孟母

死自遠方送喪蓋千乘及孟死家無十金之財又曰郭
解河內軹人任俠孝文時誅死解為人精悍不飲酒所
殺甚衆以軀借友報仇自喜為俠解姊子見殺解使人
微知賊處賊窘自歸具以實告解曰公殺之當吾兒不
直遂放其賊諸公聞之皆多解之義益附焉解出入人
皆避有一人獨箕踞視之解問其姓名客欲殺之解曰
居邑屋不見敬是吾德不修也彼何罪又曰萬章與中
書令石顯相善顯坐專權擅勢免官故郡留其牀席器

物直數百萬欲以與章章不受賓客或問其故章歎曰
章以布衣見哀於石君石君家破不能有以安也受其
財物此為石氏之禍萬氏反福耶公以是稱之又曰婁
護字君卿是時王氏方盛賓客盈門五侯兄弟爭名其
客各有所厚唯護盡入其門咸得其懽心結士大夫無
所不傾其交長者尤見親敬衆以是服之與谷永俱為
五侯上客長安號曰谷子雲之筆扎婁君卿之唇舌母
死送葬者致車二三千兩閭里歌之曰五侯治喪婁君

卿時成都侯商為大司馬衛將軍欲候護其主簿諫曰
將軍至尊不宜入閭巷商不聽遂往至護家久住移時
魏志曰楊阿若後名豐字伯陽少遊俠常以報仇解怨
為事故時人為之號曰東市相斫楊阿若西市相斫楊
阿若

詩晉張華俠曲曰俠客樂幽險築室窮山陰棲遲熊羆
穴容與虎豹林雄兒任氣俠聲蓋少年場偕友行報怨
殺人租市傍吳刀鳴手中利劍嚴秋霜騰超如電激迴

旋如流光生從命子遊死聞俠骨香沒身心不懲勇氣
如四方又游俠篇曰翩翩四公子濁世稱賢名食客三
千餘門下多豪英遊說朝夕至辯士自縱橫孟嘗東出
關濟身由雞鳴信陵西反魏秦人不窺兵趙勝南詛楚
乃與毛遂行黃歇北適秦太子還入荆

宋王僧達依古詩曰少年好馳俠旅宦遊關原既踐經
古迹聊諱興亡言顯軌莫殊轍幽塗豈異魂

宋鮑照擬古詩曰幽并重騎射少年好馳逐羶帶佩雙

韃象弧插雕服獸肥春草短飛鞚越平陸朝遊鴈門上
暮還樓煩宿石梁有餘勁驚雀無全目又擬古詩曰日
晏罷朝歸輿馬塞衢路宗黨生光華賓僕遠傾慕富貴
人所欲道德亦何懼

梁元帝劉生詩曰任俠有劉生然諾重西京扶風好驚
坐長安恒借名榴花聊夜飲竹葉解朝醒結交李都尉
遨遊佳麗城

梁吳筠詩曰結客少年歸翩翩駿馬肥報恩殺人竟賢

君賜錦衣握蘭登建禮拖玉入含暉顧看草玄者功名
終自微又古意詩曰西都盛冠蓋九達塵霧塞中有惡
少年伎能專自得玉鞭蓮花細金莖流星勒聊為路傍
人寫鞚長楸北

梁王僧孺詩曰青絲控燕馬紫艾飾吳刀朝風吹錦帶
落日映珠袍陸離關右客照耀山西豪雖非學詭遇終
是任逢遭人生會有死得處如鴻毛寧能偶難驚寂寂
隱蓬蒿

梁何遜擬輕薄篇曰城東美少年重身輕萬億拓彈隨
珠九白馬黃金飾長安九達上青槐陰道植穀擊晨已
喧肩摩暗不息走狗通西望牽牛亘南直相期百戲傍
去來三市側象林沓繡被玉盤傳綺食

周王褒遊俠篇曰京洛出名謳豪俠競交遊河南朝四
姓關西謁五侯闢雞橫大道走馬出長楸桑陰徙將夕
槐路轉淹留

周庾信詩曰俠客重連鑣金鞍被桂條細塵鄴路起驚

花亂眼飄酒醺人半醉汗濕馬全驕歸鞍畏日晚爭路
上河橋

陳沈炯長安少年詩曰長安好少年驄馬鐵連錢陳王
裝腦勒晉后鑄金鞭步搖如飛燕寶劍似舒蓮去來新
市側遨遊大道邊

陳陰鏗西遊咸陽中詩曰上林春色滿咸陽遊俠多城
斗疑連漢橋星像跨河影裏看飛轂塵前聽遠珂還家
何意晚無處不經過

陳楊縉俠客控絕影詩曰青門小苑物華新花開鳥弄
會芳春仙掌層臺浮麗日長楸廣路起紅塵園中追尋
桃李徑陌上逢迎遊俠人遊俠英名馳上國人馬意氣
俱相得白玉鹿盧秋水劍青絲宛轉黃金勒復有魚目
並龍文躡影追風本絕羣影入吳門疑曳練形來西北
似浮雲寄語幽并馳射客未肯推名待借君

報恩

毛詩曰投我以木瓜報之以瓊琚匪報也永以為好也

又曰無言不訓無德不報

左傳曰晉魏顆敗秦師于輔氏獲杜回秦之力人也初魏武子有嬖妾無子武子疾命顆曰必嫁是妾疾病曰必以為殉及卒顆嫁之曰疾病則亂從其治也及輔氏之役顆見老人結草以亢杜回躋而顛故獲之夜夢老人曰余爾所嫁婦人之父也爾用先人之治命予是以報

晏子曰晏子以粟金遺北郭騷騷辭金受粟有聞晏子見疑於景公出奔北郭子曰養及親者身更其難遂造

公廷曰晏子天下之賢去齊齊國必侵不若先死乃自殺公自追晏子及郊而反之

呂氏春秋曰秦穆公失右服馬公自往求焉見野人方食之於岐山之陽穆公笑曰食駿馬肉不飲酒予恐傷汝也遂徧飲而去及一年為韓原之戰晉人已環穆公之車晉梁由靡已扣穆公左驂嘗食馬肉三百餘人疾鬪車下遂大剋晉反獲晉惠公以歸又曰簡子有兩白驢甚愛之陽城胥渠處

陽城姓胥渠名處猶病也

廣門之官夜款門

而謁曰主君之臣胥渠有疾醫教之曰得白驪之肝則止不得則死請入通董安虧御於側簡子殺白驪取其肝以與陽城胥渠無何趙興兵而攻翟廣門之官七百
人皆先登

戰國策曰中山君饗都大夫司馬子期在焉羊羹不偏子期怒而走於楚以伐中山君中山君亡走有人挈戈隨其後者顧謂二人子奚為對曰臣父嘗餓且死君下壺飡舖臣父臣父且死曰中山有事汝必死之故來死

君也中山君慨然曰吾以一杯羊羹亡國以一壺飡得
二死士

史記曰爰盜為吳相時有從吏嘗盜爰盜侍兒盜知之
不泄遇之如初人有告從吏言君知爾與侍者通乃亡
歸盜驅自追遂以侍者賜之復為從吏及爰盜使吳見
守從吏適為校司馬守盜夜引爰盜起曰君可以去矣
吳王期旦日斬君盜謝之而去又曰項王使說韓信韓
信謝曰臣事項王官不過郎中位不過執戟故背楚而

歸漢漢王授我上將軍印解衣衣我推食食我言聽計
用深親信我我倍之不祥雖死不易

說苑曰楚莊王賜羣臣酒日暮燈燭滅有人引美人衣
美人援絕其冠纓告王曰有引妾衣者妾絕其纓取持
火來視絕纓者王曰今日飲不絕纓者不懽君臣百官
皆絕冠纓乃出火居二年晉與楚戰有一人常在前五
合五獲首王怪而問之對曰臣乃夜絕纓者也王隱忍
不曝而誅常願肝腦塗地用頸血湔敵久矣遂平晉君

漢書曰張蒼秦時為御史有罪亡歸及沛公略地過陽武蒼以客從攻南陽蒼當斬解衣伏質身大肥白如皤王陵乃言沛公赦勿斬以為常山相蒼德王陵及貴父事陵陵死蒼為丞相洗浴常先朝陵夫人上食然後敢歸家又曰蓋寬饒為衛司馬躬案行士卒廬室視其飲食居處有疾病者身自撫循臨問加致醫藥遇之甚恩及歲終交代衛卒數千人皆叩頭自請願復更留一年以報寬饒厚德宣帝嘉之以寬饒為太中大夫

吳越春秋曰伍子胥伐楚還過溧陽瀨水之上長歎息
曰吾嘗飢於此乞食而殺一婦人將欲報之百金不知
其家遂投金瀨水之中而去

三輔決錄曰高陵龐勃為郡小吏東平衡農為書生窮
乏客鍛於勃家勃知其賢禮待酬直過常農曰為馮翊
乃相報別七八年果為馮翊勃為門下書佐忘之矣農
召問乃悟遂舉勃

魏略曰楊沛為新鄭長課民蓄桑椹營豆積浸得千餘

斛太祖西迎天子軍無糧沛乃進乾榘後為鄴令賜其
生口十六人絹五百疋以報乾榘也

魏志曰太祖平幽州召孫禮司空軍謀掾初荒亂時禮
與母相失同郡馬台求得禮母禮推家財盡以與台

華陽國志曰曹公察關羽不安張遼以情問之羽歎曰
吾極知曹公待我厚然吾受劉將軍恩誓以共死不可
背之要當立効報公公聞而義之顏良攻東郡太守劉
延於白馬公使遼羽為先鋒羽望見良麾策馬刺於萬

衆中斬其首盡封其物稱書告辭而歸先主

賦齊謝朓酬德賦曰右衛沈侯眷予以國士四年忝後
朱方見贈以詩詩不云乎無言不酬無德不報故稱之
酬德賦云悲夫四游之代序六龍驚而不息輕蓋靡於
駿奔玉衡勞於拊翼嗟歲宴之渺歡曾陰默以悽惻嗟
民生之知用知莫深於知己彼知己之為深信懷之其
何已君奉筆於帝儲我曳裾於皇穆籍風雲之光景申
遊好於蘭菊結德言而為佩帶芳猷而為服予窮跡以

多悔媿離厄而獨處君紆組於名邦貽話言於川渚爾
要戟於戎禁我拂劍於郎闈願同車以日夜誠望昏而
掩扉時遊盤以未極眷落景之徂暉苦清顏之倏忽悵
歡賞之多違

書漢谷永謝王鳳書曰永斗筭之材質薄學朽將軍悅
其狂言擢之皂衣之吏廁之賓朋之末不聽浸潤之譖
不食膚受之愬雖齊桓晉文用士篤密察父指兄覆育
子弟誠無以加昔豫子吞炭壞形以奉見異齊客隕首

公門以報恩施智氏孟嘗猶有死士何況將軍之門

報讐

禮記曰父母之讐不與其戴天兄弟之讐不反兵交遊之讐不同國又曰居父母之讐寢苫枕干不仕弗與共天下也遇諸市朝不反兵而鬪

左傳曰齊高發伐莒莒子奔紀鄆初莒有婦人莒子殺其夫已為嫠婦託於紀鄆紡焉以度而去之及師至則投諸外齊師夜緹而登莒共公懼啟西門而齊師入紀

又曰吳伐越越王句踐御之陳于檣李闔廬傷將指還
卒於陘夫差使人立於庭出入必謂曰夫差而忘越王
之殺而父乎則曰唯不敢忘三年乃報越

越絕書曰子胥入吳闔廬將為之報讐其後荆將軍伐
蔡使子胥伐荆十五戰十五勝子胥操捶笞平王之墓
而數之曰吾先人無罪而子殺之今以此報子

戰國策曰豫讓欲為智伯報讐趙襄子當出豫讓伏劍
橋下襄子至橋馬驚曰必是讓也求之果是數之曰子

不事范中行氏乎智伯盡滅之子不為報讐反臣於智伯知伯亦已死何報讐深也荅曰范中行衆人遇我我以衆人報之智伯國士遇我我以國士報之襄子曰子為智伯名既成寡人赦子亦屢已荅曰君前赦臣天下莫不稱君之賢臣固伏誅然願請君之衣而擊之以致報讐之意乃使使持衣與讓讓拔劍三躍而擊之曰吾可以下報智伯矣遂伏劍死

史記曰秦昭王聞魏齊在平原君所欲為睢報讐乃為

書遺平原君曰願與君為布衣之交十日之飲平原君見昭王昭王與平原君飲數日謂曰范君之讐在君家願使人歸取頭來平原君曰不在臣所昭王乃令趙王發卒圍平原君家魏齊夜亡

東觀漢記曰海曲有呂母其子為縣吏犯小罪縣宰殺之呂母家素富豐貲產乃益釀醇酒少年來沽者貫之視其乏者輒假衣裝少年欲相與償之呂母垂泣曰縣宰枉殺吾子欲報怨爾諸君寧肯哀之乎少年許諾遂

相聚得數百人因與呂母入海自稱將軍遂破海曲執
縣宰斬之以其首祭子冢又曰郅惲與董子張友子張
父為鄉人所害及子張病將終惲候子張視惲歔歔不
能言惲曰吾知子不悲天命而痛讐不復也惲即將客
遮讐人取其頭以示子張子張見而氣絕又曰趙喜少
有節操從兄為人所殺無子喜常思欲報之遂往復讐
而讐家皆疾病喜以因疾報殺非仁者心且釋之而去
顧謂讐曰爾曹若健遠相避後病愈悉自縛詣喜喜不

與相見後竟殺之

吳書曰甘寧殺凌統父孫權命不得讐之嘗與呂蒙舍酒酣統乃以刀舞寧起曰寧能雙戟舞蒙曰未若蒙之巧也因操刀楯以身分之

列女傳曰維氏女玉為父報讐吏執玉以告外黃令梁配欲論殺玉申徒蟠時年十五進諫曰玉之節義足以致感無耻之孫激忍辱之子不遭明時尚當表旌廬墓况在清聽而不加哀矜配善其言乃為減死論又曰龐涓

母者趙氏女字娥父為同縣人所殺而娥兄弟三人俱時病物故讐乃喜以為莫已報娥乃潛備刀兵以候讐家十餘年後遇於都亭刺殺之因詣縣自首曰父讐已報請就刑又曰衛義姬者其夫有先人之讐讐家來報壻避之讐家得義姬問壻所在乃積薪燎之遂不言而燒死又曰潁川公孫氏女河年十三怨家報其父父走得免河與母俱亡母先見得仇人遂欲甘心河馳出叩頭涕泣曰老母常有篤疾安足殘戮以塞忿哉我是其

兒父母所憐不如殺我讐遂殺之而捨其母又京師節女者本夫有讐讐家欲報其夫乃劫其妻父使要其女中間父呼其女而告之計女念不聽之則殺父不孝聽之則殺夫不義欲以身當之曰諾因曰夜在樓上新沐頭東首卧則是矣讐家果至斷其頭持去明而視之乃其妻之頭也讐以為義遂釋其夫

會稽典錄曰董黯家貧採薪供養母甚肥悅鄰人家富有子不孝母甚瘦小不孝子疾黯母肥常苦之黯不報

及母終負土成墳竟殺不孝子置塚前以祭

晉中興書曰桓溫父被害時溫年十五枕戈泣血經年乃提刀直進手刃讐人

詔魏文帝詔曰喪亂以來兵革縱橫天下之人多相殘害者昔田橫殺鄒商之兄張步害伏湛之子漢氏二祖下詔使不得相讐今兵戎始息宇內初定民之存者非流亡之孤則鋒刃之餘當相親愛養老長幼自今以後宿有讐怨者皆不得相讐

教梁簡文帝甄異張景願復讐教曰夫理感禽魚道均
荊棘亦有鄉因行改江以孝移張景願自縛到郡稱其
父為韋法所殺今於公田渚斬法級祭墓訖束身歸家
昔沂澤撫劍河南執戟遠符古義實足可嘉防廣刃讐
赦其桎梏之罪丁蘭雪耻擢以大夫之位

盟

周官曰凡邦國有疑會同則掌其盟約之載盟萬民之
犯命者詛其不信者有獄者則使之盟詛凡盟詛各以

其地域之衆庶供其牲而致焉

尚書曰惟十三年大會于孟津王曰嗟我友邦冢君越我御事庶士明聽誓今商王受弗敬上天降災下民沈湎冒色敢行暴虐罪人以族官人以世惟宮室臺榭陂池侈服以殘害于爾萬姓皇天震怒命我文考肅將天威大勲未集肆予小子發以爾友邦冢君觀政于商同力度德同德度義受有臣億萬惟億萬心予有臣三千惟一心商罪貫盈天命誅之予弗順天厥罪惟鈞爾尚

弼予一人永清四海又曰時厥明王乃大巡六師明誓
衆士王曰嗚呼我西土君子商王受狎侮五常荒怠不
敬自絕于天結怨于民斲朝涉之脛剖賢人之心作威
殺戮毒痛四海崇信姦回放黜師保屏棄典刑囚奴正
士郊社不修宗廟不享作奇技淫巧以悅婦人爾其孜
孜奉予一人恭行天罰

左傳曰晉侯獻楚俘于王王子虎盟諸侯于王庭要言
曰皆獎王室無相害也有渝此盟明神殛之俾墜其師

無克祚國及而玄孫無有老幼君子謂是盟也信又曰
甯武子與衛人盟于宛濮曰天禍衛國君臣不協今天
誘其衷使皆降心以相從也不有居者誰守社稷不有
行者誰扞牧圉不協之故用昭乞盟于爾大神自今日
以往行者無保其力居者無懼其罪有渝此盟明神先
君是糾是殛國人聞此盟而後不貳又曰楚子圍鄭鄭
伯肉袒牽羊以逆楚王曰其君能下人必能信用其民
矣退三十里而許鄭人平潘尪入盟子良出質又曰楚

師圍宋宋人懼使華元夜入楚師登子反之牀起之曰
寡君使元以病告曰樊邑易子而食析骸而爨雖然城
下之盟有以國斃不能從也去我三十里唯命是聽子
反懼與之盟而告王退三十里又曰諸侯伐鄭同盟于
亳載書曰凡我同盟無蘊年無壅利無保姦無留慝救
災患恤禍亂同好惡獎王室或簡茲命司慎司盟名山
名川羣神羣祀先王先公七姓十二國之祖明神殛之
俾失其民墜命亡氏踣其國家

史記曰吳起東遊出衛郭門與其母別齧指而盟曰起不為卿相不復入衛

漢書曰高后立諸呂為王王陵曰高皇帝刑白馬而盟非劉氏而王者天下共擊之今王呂氏非約也

淮南子曰胡人彈骨

胡人之盟約置酒人頭骨中飲以相誼也

越人剡臂中

國軟盟所由各異其於信一也

晉中興書曰中宗以祖逖為前鋒都督徑北渡江中流誓曰祖逖不清中原而復濟者有如此江又曰吳主孫

權與蜀盟文曰天降喪亂皇綱失敘逆臣承釁劫奪國柄始於董卓終於曹操九州輻裂普天無繼及曹子丕偷取天位而叡么麼尋亦凶逆昔共工亂象而高辛行師三苗干度而虞舜征焉今日滅叡擒其徒黨非漢與吳將復誰在建大事必先盟誓漢之與吳雖信由中然分土列境宜立盟約使東西士民咸共聞知既盟之後戮力一心同討魏賊救危恤患分災共慶各守分土無相侵犯傳之後葉克終若始有渝此盟創禍先亂俾墜

其師無克祚國

文晉劉琨與段匹碑盟文曰天不靜晉難集上邦四方
豪傑是焉扇動乃憑陵于諸夏俾天子播越震蕩罔有
攸底二虜交侵區夏將泯神人乏主蒼生無歸百罹備
臻死喪相枕肌膚潤於鋒鏑骸骨曝於草莽千里無烟
火之廬列城有兵曠之邑茲所以痛心疾首仰訴皇穹
者也臣琨蒙國寵靈叨切台岳臣碑世効忠節忝荷公
輔大懼醜類猾夏王旅殞首喪元盡其臣禮古先哲王

貽厥後訓所以翼戴天子敦序同好者莫不臨之以神明結之以盟誓故齊桓會於邵陵而羣后加恭晉文盟於踐土而諸侯滋順加臣等介在遐鄙而與主相去迥遠是以敢干先典刑牲軟血自今日既盟之後皆盡忠竭節以翦夷二寇有加難於琨碑必救加難於碑琨亦如之繾綣齊契披布曾懷書功金石藏于王府有渝此盟亡其宗族俾墜軍旅無有遺育

晉庾闡為郗車騎討蘇峻盟文曰賊臣祖約蘇峻不恭

天命不畏王誅凶戾肆逆干國之紀稱兵攻宮焚掠宗廟遂乃制脅幼主有無君之心大行皇太后以憂厄崩殂殘害忠良禍虐烝民窮凶極暴毒流四海是以率土怨酷兆庶泣血咸願奉辭罰罪以除元惡今主上幽危百姓倒懸忠臣烈士志在死國既盟之後戮力一心共翦醜類殞首喪元以救社稷若二寇不梟無望偷安當令生者不食今誓死者無媿黃泉


晉王羲之為會稽內史稱疾去郡於父墓前自誓文曰

義之不天夙遭閔凶遂因人乏蒙國寵榮每仰詠老氏
周任之誠常恐斯亡無日是用寤寐永歎若陸深谷止
足之分定於今日稽顙歸誠自今之後敢渝變此心貪
冒苟進是有無尊之心而不子也子而不子天地所不
覆載也名教所不得容也信誓之誠有如皎日

陳沈炯為陳武帝與王僧辯盟文曰侯景戎羯小醜逆
天無狀背我恩義破我國家毒我生民改移我廟社誅
鋤我郡縣割裂我宗姻我高祖靈聖聰明光宅天下勛

勞兆庶亭育萬民哀景以窮見歸全景將戮之首授景
要害之地崇景非次之榮於景何怨而景長戟彊弩陵
感朝廷剝肝斲趾不厭其快高祖菜食卑宮春秋九十
屈意凝威憤終寇手大行皇帝溫嚴恭默不守鴻名於
景何有復加忍毒豈有率土之濱忍聞此痛僧辨等荷
相國湘東王泣血銜冤之寄摩頂至踵之恩能不漚膽
抽腸共誅姦逆叶和將帥同心共契必誅凶豎尊奉湘
東王嗣膺鴻業以主郊祭若一相欺負一相違戾天地

宗廟是謹是詰





藝文類聚卷三十三